

रवि शाक्य, इखाउँ, यल

मणिचूड जातक

1979 लुम्बिनी वर्षया उपलक्षे



मणिचूड जातक



संशोधक
सूर्यलाल वज्राचार्य



सम्पादक
बोधिरत्न वज्राचार्य



प्रकाशक
धर्मकीर्ति बौद्ध अध्ययन गोष्ठी
श्रीघः, नघः
काठमाडौं

बुद्ध वर्ष २५२२
नेपाल संवत् १०९९
विक्रम संवत् २०३६
द्वितीन संस्करण १०००



थाकू :

शाक्य प्रेस

बुद्धाः, ये । फोन । १३६०४

निगू शब्द

नेपाले मणिचूड जातक बौद्ध साहित्यया छगू महान धर्म ग्रन्थ खः ।
श्व ग्रन्थ नेपालवासी न्ह्याथेजाह्य मानवपिसं नं स्यूगु बाखँ खः । गुलि
'वेस्सन्तर जातक'या प्रसिद्ध जू; उलि हे श्व ग्रन्थया नं प्रख्यात दु ।

नेपाले नेवा भाषां उल्लेख याना तःगु केवल ३२ (स्वीनिपु) जातक
जक धाइ, तर श्व खेँ छत्थुं विश्वास याय् थाय् मदु । प्यंगू असंख्य छगू
लाख कल्प न्हापा सुमेध तापसं भविष्यवाणी (कलियुगे) जि बुद्ध ज्वी
देमा धका दिपंकर भगवानया न्ह्योने प्रार्थना यानां अनेक जाति अनेक
योर्ना जन्म कया पारमी पुरे याना बिज्यागु बोधिसत्त्वावतार उलि मयाक
नेवा आखलं अङ्कित याना तःगु जातक माला धंगु ग्रन्थं प्रमाण या ।

गुलि मागधि भाषा बोधिसत्त्वावतार उपलब्ध जुथा चवंगु खः, उलि
हे नेवा आखलं नेपाले अवश्य दया चवने मागु खः । परन्तु ऊं नेपालवासी
नेवा ग्रन्थकारक आचार्य्यपिनि छु गथे जुया प्रचार याय्गु सनय अभाव
जुल जुइ, छगू छगू ग्रन्थ छ्वेत दं दं बिते जुथा नं सिमधगु दु । उकिं जक
सक्षिप्त रूपं बोधिसत्त्वया निनां बिद्या तःगु ज्वीमा । अवदान, ललित-
विस्तर जातकावलि आदि महायान बौद्ध साम्प्रदाय ग्रन्थे बोधिसत्त्वया नां
जक मु का स्वत धासा स्वीनिपु जातक स्वया नं अप्पो बोधिसत्त्व जन्म का
बिज्यागु अभिव्यक्त जू । गुलि मागधि (पालि) भाषां प्रचलित जुया चवंगु
खः, उलि हे देमाः धंगु जिगु ध्येय खः ।

प्रकाशकीय


धुंयात ला ध्यना नकूह्य महासत्त्व राजा व मडिचूड राजां थःगु
छयने च्वंगु मणि दान बीत कःति फाय्कूगु घटनात न्यने बले की आश्रय
चाः ।

बुद्ध ज्वीत.दान पारमी आदि पूर्ण मयासे मज्यू । धुंयात ला ध्यना
नकूगु व मणिदान बीत छयने कःति फाय्कू बलेसिगु चित्त गुलित बःला
थ्व विचारणीय जू । अध्ययन याय् बह जू । उकिं हे छः धर्मकीर्ति
बौद्ध अध्ययन गोठ्ठीं थ्व सफू प्रकाशित यानागु । थ्व सफू बुटवली चव्ह्य
बोधिरत्न वज्राचार्य सम्पादन याना न्योन्यादें न्हापा बुद्धवर्ष २४९७ स
स्थानीय त्रिरत्न दान पात्र संघ पाखें पिकया तःगु छः । थुको भति भति
संशोधन याना द्वितीय संस्करण याना पिकया च्वना । थ्व धर्मकीर्ति
प्रकाशनया न्ये च्यागूगु सफूया रूपे पाठकपिनि न्ह्योने ते खना धर्मकीर्ति
परिवारया लेता वो । थुगु मणिचूड जातक सफू छापे याय्त् माक्व आर्थिक
सहयोग बिया दीह्य श्री हेराकाजी उपासक दिल्ली बजारयात आपालं
धन्यवाद बियां च्वना ।

महासत्त्व राजा धुंयात ला ध्यना नकूगु व मणिचूड राजां मणि दान
व्यूगु निगू नं घटना बुद्ध जन्मभूमि नेपाले जूगु गौरबया खें छः ।

प्रफू स्वया बिज्याम्ह श्रद्धेय अभ्यघोष भन्ते नं धन्यवादया पात्र जू ।

— धम्मवती



हेराकाजी राजकर्णिकार

धर्मदान

फुक्क दान मध्ये धर्मदान तःधं धयागु न्यना
तयार्थे श्व त्याग चेतना बल्लागु बाखँ सफू
'मणिचूड जातक' छापे याना धर्मदान
मानागुलि दिवंगत मां-बौपिन्त
निर्वाण सुख प्राप्त ज्वीमा
धका कामना यानाह्य

— हेराकाजी उपासक
डिल्लीबजार, हलवाई पसः
काठमाडौं, नेपाल

—:वर्तमान खँ:—

न्हापा श्रावस्ती नगरे अनाथ पिण्डिक सेठं दयका तगु जेतवन विहारे भगवान बुद्धया प्रभावं देव-दैत्य पिनि चित्ते धर्म चक्षु उत्पत्ति जुल । अले सभाषदे आनन्द भिक्षुं भगवान बुद्धया महान प्रभाव खना जिपिं सकलें आश्चर्य अद्भूत जुल । धन्य ! छलपोलया प्रभाव धका गुण वर्णना यात ।

अले आनन्द भिक्षुया थ्व खँ न्यनालि भगवान बुद्धं थथे आज्ञा जुया बिज्यात—

हे ! भिक्षु गणपिं छिपिं आश्चर्य चाय् मागु मद्दु, आजक मखु जिगु थ्व प्रभाव न्हापा नं थथे हे आश्चर्य ज्वीक केना वय धुन, यदि छिमि न्यनेगु मनसुबा दुसा जिं कना हय, बाँलाक ध्यान तया न्योँ धया अतीत खँ कना बिज्यात ।

अतीत खँ

न्हापा साकेत देशे ★ साकेत राजां राज्य याना च्वंगु बखते, लुच्चा, ज्यानमारा, छल-कपटी धैपिं मद्दु । नयेगु, त्वनेगु आदि ले नं दुःख मज्जू ।

★ साकेत राजायाथाय् ब्रह्मदत्त राजा नं धया तगु दु । साकेत देश धैगु अयोध्या घाइ, तर अयोध्या देशयात धागु मखु ।

२)

सकल प्रजापिन्त सुख व शान्ति बिया धर्मानिकुलं राज्य
पालन याना च्वन ।

अले छन्हु राजाया गुहा ख, अग्रमहेशी कान्ती मती
महारानीया गर्भे बोधिसत्वं बास यात । गुखुनु बोधि-
सत्वं गर्भे बास यागु ख उखुनुनिसें गर्भिणी महारानीया
धर्म चित्त उत्पत्ति जुल ।

अले थह्य स्वामीया न्ह्योने च्वना बिन्ती याना
थथे धाल:-

भो ! महाराज जिगु गर्भे महान कष्ट जुल उकिं
जिगु मने दान बीगु अभिलाशा जुल । गथे धाःसा
सुवर्ण द्वय च्वना दक्को फुकं सुवर्ण भिक्षु संघपिन्त
व ब्राह्मण, याचकदिपिन्त दान-प्रदान याय धैगु मती
जुल, धका मनया खँ दन ।

अले जुजुं थथे शुभ खँ न्यना महारानीया कामना
यात हर्ष पूर्वकं सफल याना बिल । दानया प्रभावं छुं
दिन तक महारानीया गर्भ मद्रुह्य थें च्वंक याउँसे च्वना
क्रमशः; हानं न्हापा थेतुं ऊयातुया वल । वेवं पुन थथे
मने ल्वीकल, 'सुवर्ण-सिंहासने' च्वना छक धर्मो पदेश
बीदुसा गुलि ज्यू खई, धैगु मती तया छन्हु राजा याके
निवेदना यात ।

‘भो ! प्रभू महाराज आः हानं जित छगू थथे मती

लुल कि, सुवर्ण सिंहासने, चवना प्रजा लोकपिन्त धर्म
कथा न्यंकेगु मनोकांक्षा जुल । कृपया जित अनुकम्पा
तसे धर्मोपदेश याका बिज्याहुँ, धका याचना यात ।

अले रानीया थ्वः खँ न्यना राजा अद्भूत चाया
ज्योतिषयात सःता रानीया मनोभाव वृतान्त न्यंकल ।
ज्योतिषं नं गर्भिणी महारानीया मनोभाव यात यथार्थ
सीका धाल—

‘महाराज ! कान्तीमती रानी नं इच्छा यागु मेगु
कारणं मखु, रानीया गर्भे दान बोगुलि अघाय् मज्जीह्य
‘प्रभावशालिह्य दानवीर बालखँ बास कागु दु । थुकी
महाराजं कान्तीमती रानीया मनसुवायात पुरे थाना
बिज्याहुँ धका धाल ।,

अले जुजु ज्योतिषया खँ न्यना अत्यन्त हर्षमान
जुया रानीया इच्छा मुताबिक पूर्ण याय्त मन्त्रीयात
सःता थथे धाल ।

भो ! मन्त्री थौं कान्तीमती महारानीयात सुवर्ण
सिंहासने तया धर्म व्याख्यान याकेगु जुल । उकिं
‘सिंहासन, राजंगने तयका, नगरे घण्टा घोषण याके
छो धका धाल । अले मन्त्रीं राजाया खँ शिरोपर
याना नाय् तय्त नगरे घोषणा याके छोट ।

नाय्त नं गाँ गामे, त्वा-त्वाले, ननिचा पतिकं वना

घोषणा यात- भो प्रजा गणपि ! थौं की अग्र महारानीं
राज्य सिंहासने विराजमान जुया धर्मोपदेश बीगु जुया
चवन, उकिं धर्म प्रेमी सकल सज्जन, सज्जनीपि राज
दबारे वय् माल ।

अले नगरवासी नर-नारीपि कान्तीमती महा-
रानीया व्याख्यान न्यनेत मिसा-मिजं आदि थवचा थवचा
मुना हर्षं राजंगने बल ।

महारानीया नाना प्रकारया तिसा वसतं पुना
हिरा-मोती मालां कोखाया दरबारं प्याहाँ वया सुवर्ण
सिंहासने स्वचाः हुला पुचः मुना चर्वपि प्रजा परि-
षद खना मने अतिकं स्वां होय्का आसने चवना
बिज्यात । अध्ययन याना मतसां 'गर्भ' वासी बोधिस-
त्वया प्रभावं, गाथा द्वारा महारानीं दशांकुसल पापं
बचे ज्वीगु देशना याना बिज्यात ।

श्लोकः—'कायकं त्रिविदं पापं वाचकं चतुर्विदं

मानसं त्रि प्रकारेण तत्सर्वो देशयाम्यहं ।,

अर्थः—

कायं याइगु पाप स्वताः— जीवहिं सायाय्गु, खुया
काय्गु, परस्त्री सेवन याय्गुयात धाई ।

वाकं याइगु प्यताः— ऊठ खं ल्हाय्गु, चुगली खं

ल्हाना ज्वीगु, कठोर वचन ल्हाय्गु, फजुल खँ ल्हाय्गु-
यात धाई ।

मनं याइगु स्वताः— परया धन-द्रव्ये लोभ लालची
तया ज्वीगु । परयात सी मा, स्यनेमा विनाश ज्वीमा
धका द्वेष भाव तया ज्वीगु ।

न बीगुया फल, न दानया फल न पूजा यानागुया
फल दु, न मान सत्कार यानागुया फल दु । न भि-
मभिया कर्म फल दु । न इहलोक दु, न परलोक दु ।
न मां दु, । न बौ दु । न सिना वनालि हानं जन्म ज्वीपिं
सत्त्वपिं दु धका मखुगु दृष्टि तया चवनेगुयात धाई ।

मणिचूडया जन्म

थनंलि कान्तीमती रानीया गर्भ याउँल, क्रमानु-
कालं फिला नं पूर्ण जुल । जुसैली महारानीं अती
तेजस्वीह्य, प्रभाव शालीह्य, सुन्दर बालख अभ्युदय
यात । बालखया शिरस मानो सूर्य समानगु रश्मि
प्रकाश दुगु मणिरत्न नं उत्पत्ति जुया चवन, थव
मणिरत्नया किरण राज दरबारिं प्याहाँ वना साकेत नगर
छगुलिं जाज्वल्यमान जुया नगरवासी नर-नारीपिं
सूर्योदय जुल धका कालाकुलुं हाहां दन । आकासे
नं देवगणपिं वया नाना प्रकारया स्वाँ वा नाका हल ।

६)

राजकुमार जन्म जूषानिसें दुर्मिज्ञादि नं तना वन,
जनतापिनि मने नं अत्यन्त हर्ष जुल ।

भणिया लक्षण

रोगीपिन्त मणि जल त्वंका बीवं रोग शान्त
ज्वीगु । मिखां मखंपिन्त मणि थीका बीवं खनीगु ।

दुर्मिक्षादि जूसा मणि जलं सकबनं हाःहाः याय्वं
सुभिक्ष ज्वीगु ।

द्रव्यादि वस्तुले स्पर्श व जल हाःहाः याय्वं धन
सम्पति उत्पन्न ज्वीगु, एवं प्रकारं बालखया शिरे
सर्वलक्षणं युक्तगु मणि उत्पन्न जूगुलिं साकेत नगरे
अनेक प्रकारया भय दुःख हरण जुया वन ।

थनंलि व मचायात नां छ्वीत पुरोहित-अमात्यादि
(मन्त्रीपित) सःता छु धका नां तय् योग्य ज्वी धका
न्यन ? अले सुबाहु मन्त्रीं महाराज ! श्व कुमारयात
ला 'मणिचूड कुमार' धका नां तय् योग्य जू धका
प्रस्ताव तल । श्वहे प्रस्तावयात सकलसितं समर्थन
यात, जुजुं नं सवं सम्मति पास जूगु नां तय् मा धका
कुमारयात मणिचूड कुमार धका नां प्रसिद्ध यात ।

क्रमशः व मचा न्हिया न्हियं तःधिक जुजुं न्यादया
उमेरे छह्य योग्यह्य गुरूया ल्हाते लः ल्हाना विद्या

अध्ययन याकल, विद्या अध्ययन यायां सर्वाङ्गः शास्त्रं
निपुण जुल । अले व मचां देशया लागी व जनताया
लागी हित-सुख याय्त बरोबर करूणादृष्टि गथे याःसा
प्रजापिन्त सुख व शान्ति स्थापना ज्वी धैगु मने
तया च्वन ।

छन्हु व कुमारया शुभ चरित्र खना बौह्मसिनं
थथे मती तल । आः ला जि काय् मणिचूडया राज्य
चले याना यंकेगु शक्ति दत । जि आ बुढा नं जुल,
शरीर नं आपालं भ्वाथ ज्वी धुंकल, राज्य भोग याना
च्वनेगु अवस्था मखुत, धका चिन्तना याना छन्हु
मणिचूड कुमारयात सर्वाङ्गः राज्य लः ल्हाना अभिषेक
बिया तपोवन प्रस्थान याना बिज्यात ।

थनंलि मणिचूड राजां धर्मानुकूलं न्याय नीति पुरे
याना प्रजागणपिन्त अनेक प्रकारं सुख व शान्ति बिया
प्रतिपाल याना राज्य चले याना च्वन । राजाया अतिव
प्रेमपि भद्रगिरि किसि छम्ह व न्हिछिया १०० गू योजन
ब्वाहाँ वने फुपि सल-किसि नं दु ।

पद्मावती जन्म

उगु हे समय भार्गव गोत्र भवभूति, धैह्य ऋषी
हिमालयया आसपासे च्वंगु पर्वत गुफाय् ध्यान योग

८)

याना चवन । छन्हू व ऋषी पर्वतया जोले स्वय् धका
 आश्रमं दना प्याहाँ वन । अन अनेक प्रकारया वृक्ष-
 लताय् किसिम किसिमया स्वाँ ह्वया सुशोभित जुया
 चवंगु व पुखुली दोलछि हः प्याहाँ वया पले स्वाँ ह्वया
 चवंगु छोने सर्व लक्षणं युक्तह्य सौन्दर्यशालीह्य कन्या
 छम्ह खन । अले उम्ह बालिकायात काय्गु इच्छां
 पुखुली क्वाहाँ वना मचायात तीजक कया पलिहलं
 त्वपुया हर्षपूर्वकं थःगु आश्रमे यंका धर्मपुत्री भाःपाः
 स्याहार-सम्भार याना प्रतिपाल याना तल । छुं दिन
 दय्का ऋषीं मचायात 'पद्मावती' धका नाँ तल । क्रमश
 व मचा तःधिक जुया वल । रूप नं ऊँऊँ बाँलाना शुक्ल
 पक्षया चन्द्रमा थें न्हियाँन्हि यौवन जाया वल । पद्मा-
 वतीया यौवन जाया वःगुलिं भवभूति ऋषीं मणिचूड
 राजायात विवाह याना बी योग्य जू धका उम्ह युवती-
 यात नापं ब्वना साकेत नगरे वना राजा मणिचूडयात
 थथे धाल :-

भो ! प्रतापि महाराजा छपिन्त अत्यन्त लोम्ह रूप
 सम्पन्नह्य कन्या छह्य दान बीत हया तया, छपिसं कृपा
 तसे ग्रहण याना बिज्याहुँ धका राजाया ह्लाती लःह्लाना
 बिल, राजां नं उह्य सौन्दर्यं परिपूर्ण जुया चवंह्य
 युवतीयात स्वीकार याना अग्रमहारानी यात ।

थनंलि ऋषीश्वरया प्रति श्रद्धा उत्पन्न याना राजां
धालः—

भो ! ऋषी मुनि आःजिके छु फोनेगु इच्छा दु, व
फोना बिज्याहुँ, जि बिइ धका धाल ।

अले जुजुया थथे खँ न्यना ऋषीश्वरं फोन— महा-
राज ! मेगु ला छुं जित अपाय्‌व्वकं आवश्यकता ला
मदु, केवल जित पुण्य छता जक परमावश्यक जुयाच्वन ।
यदि छपिसं बिया बिज्याय्‌गु जूसा थव फोनागु बिया
बिज्याहुँ धका धाल ।

अले राजा मणिचूडया गय्‌याप् गय्‌याप् जुया
ऋषीश्वरयात थथे आज्ञा जुल ।

भो ! ऋषीश्वर थमं याको पुण्य थःत दइगु खः
मेपिसं यागु पुण्य दयकेत थाकु । एनं जि यात धाःसा
याको दानादि पुण्यया भाग छपिन्त नं बीगु जुल ।
थुकी निश्चित जुया बिज्याहुँ, धका बिदा बिया छोट ।

ऋषीश्वरया नं मने तथा थःगु आश्रमेसं ल्याहाँ वना
मागु ध्यान भावना याना च्वन । तदनंतर पद्मावतीया
गर्भ नं दत्त । किला पूर्ण ज्वीवं कामदेव समानह्य सुन्दर
बालख छह्य नं जन्म जुल, अले व मद्यायात माँया पाखें
पद्मोत्तर राजकुमार धका नाँ छुता ।

देवसभा

थनंलि राजा मणिचूडं पूर्णिमाया दिवसे अमा-
 त्यादि सकल राजकुमारपिन्त सःता धर्मया विषये
 छलफल याना चवन । थुगुहे बखते चतुर्दिशाया राजा
 धृतराष्ट्र, विरूधक, विरूपाक्ष, वैसवन, प्यह्य थुपिं दिग्-
 पाल राजापिं मक्ष मण्डलस चाह्युह्युं साकेत नगरे
 थ्यंक वल । उगु बखते राजा मणिचूडया प्रभावं अमित
 मार्ग बन्ध जुल । अले मार्ग बन्ध जूगुया कारणं दिग्पाल
 पिसं ज्योतिष्पथं कोस्वल, राजा मणिचूडं धर्माभ्यास
 याना चवंगु खना अनं तुं प्यह्य दिग्पाल ल्याहाँ वना
 'देवराज इन्द्र' यात वृत्तान्त समाचार प्वंकल ।

अनंलि शक्रदेव राजां नं थःगु देव भुवने सकल
 देवगणपिन्त समुह याना अनुशासना बिल — भो !
 देवपुत्रापिं मक्ष मण्डले दयावान महाप्रतापि मणिचूड
 राजां दान धर्म याना अमरावती भुवन निश्चय नं प्राप्त
 याना काइगु जुल । आः छु छु जक विघ्न प्याहाँ वइथें
 धका हाला चवंक चवंकं मणिचूडं लोक देवसभास
 जाज्वल्य मान जुल । तर व आलोक गुह्यसिके वःगु खः
 निश्चय सुं देवतां नं याय्मफु । परिणामे चतुर्मुख ब्रह्मा
 परिषद् मध्ये वया थथे धाल—

है कोशिक, समस्त प्राणी उद्धार याना स्वर्ग लोके
वयत तत्पर जुया च्वंह्य गुह्य खः महाराजायात संहार
याय योग्य जुज धका धया वन ।

निरंगद योग चिन्तना

थनंलि मणिचूड राजा उखुनुया रात्रीसं निरंगद
योग याय् धका मने तथा पुरोहित शादित्य ब्राह्मण व
मन्त्रीयात सःता मनयागु खँ कना उपाध्याय याके
न्यन ?

अले उपाध्याय ब्राह्मणं जुजुयात साहस बिया थये
धाल, महाराज इमिसं मने भाष्यगुखँ बडो उत्तमगु कार्य
खः । जि थुकी साप हे हर्ष दु । महाराजां थुकी विधि-
विधान पूर्ण याना शास्त्रानुकूलं यात धासा लुँ, वह,
हिरामोती, सल-किसी रथ वस्त्र अन्न लासा फांगा
आदि सविन्यानक अबिज्ञानक वस्तु मा धका ब्यख्या
याना धाल ।

अले जुजुं थ्व खँ न्यनालि मन्त्रीयात आज्ञा बिल —
सुबाहू ! उपाध्यायनं छु छु सामग्री मा धागु खः व
फुक्क सकतां तैयार याना दानशाला छू नं द्यक्कि धका
नियोजित यात ।

न्याम्ह ब्राह्मणं पवंगु न्याता वस्तु

जब दान यायगु मती तल अनंलि न्याह्य ब्राह्मण वया मणिचूड राजायाके न्याता रंगया खँ कना धन फोन ।

प्रथम ब्राह्मणं- भो ! महाराज, जि ह्याय्मवा छह्य दु आः व ल्यासे जुल । पेहनं बिया छ्वेत जिके धन मदु, जि सायहे दरीद्र, उकिं छलपोलयाके धन भतिचा फों वया कृपा तसे बिया बिज्याहुँ धका याचना यात ।

दुतिय ब्राह्मणं- महाराज जित व्याधि (रोगं) कया चवन, वास याय्त ध्यवा भचा माल । अनुकम्पा तसे बिया बिज्याहुँ धका धाल ।

तृतीय ब्राह्मणं- भो ! महाराज, जि याक काय् छम्ह दु, धन वयना जि काय्यात, साहुँ विना यंकन आः व पुत्रयात लिपयाय्त धन माल । कृपा धन तसे जित भचा बिया बिज्याहुँ धका फोन ।

चतुर्थ ब्राह्मणं- भो ! महाराज, प्रतिव्रता धर्म चवना चवम्ह जिम्ह मिसा खुं खुया यन आ व मिसा लिपयाना ह्य माल । जि धाःसा निर्धनम्ह, उकिं जित नं धन भतिचा अनुकम्पा तसे बिया बिज्याहुँ धका फोन ।

पञ्चम ब्राह्मण— भो ! प्रभू महाराज, जिगु शरीर ज्याथ जुल, पंच इन्द्रिय दुर्बल जुल, कमाय् याना नयगु समर्थ मन्त । उकिं जीवन निर्वाह याय्त धन भचा फों वया, दया तसे जित बिया बिज्याहुँ धका याचना यात ।

अले मणिचूड राजां थुपि न्याहसियागु दुःखया खँ न्यना नुगलं सहाय मफया स्वर खाखा तुयका हि हे लनं खोल ।

जुजुं विलाप यागु खना ब्राह्मणपिसं छाया खोया बिज्यानागु ? छु जिमित धन बी माला खया बिज्यानागु लाः ? धका न्यन ।

अले मणिचूड राजां उत्तर बिल । ब्राह्मण ! छिमित धन बी माला खयागु मखु कारण थ्व कि छिमिगु महादुःखा खँ न्यना हृदयं सह यानां सह याय मफेक नुग खुलुलुलु मिना वल उकिं जि खयागु । छिमित गुलि धनया आवश्यखः, उलि धन जोनाहुँ, धका न्याहसित गाक्क धन सम्पति बिया सन्तोष पूर्वकं छोट ।

दान काण्ड

थनंलि मन्त्रीं मागु सामान व दानशाला तैयार याना जुजुयात निवेदन यात— महाराज पुरोहितजुं धया

बिज्यागु फुकं तैयार जुल । जले अयौध्या नगरया
 राजा दुर्खेसह (दुर्पसह) सहित सकल राज महामात्यपि
 व श्रमण-ब्राह्मण-याचकादिपिन्त सूचिपत्र छोट । सूचि-
 पत्रया अनुसारं यथा समय निरंगद कार्यस, सह भागी
 जूवल । वोपिं सकल राज-अमात्यपिन्त पिशेष स्वागत
 याना आश्वासन बिया, पद्मावती नापं यज्ञशालाय
 वनालि ब्रह्मरथ पुरोहितं शास्त्रानुकूलं यज्ञ याका
 धाधाः पिन्त धाः धाःगु धन-द्रव्य बिया न्योन्हु तक्क
 दान-प्रदान याना च्वन ।

भेषधारी राक्षस

अले दानया प्रभावं शक्रदेवया आसन क्याना वल,
 ईन्द्र सुमुक च्वने मफुत । मफुसेलि राजाया दानबीगु
 इच्छा परिक्षा याय् धका न्योछ्हुया प्रभात काले अम-
 रापुरं क्वाहाँ वया महा भयानक राक्षस भेष कया
 आहुती अग्निकुण्डले, जाज्वल्य ज्वीक प्रकट जुया
 राजाया ख्वा स्वया मे चुलु-चुलु पिकया म्हुतु वां वां
 खाया हट्टट न्हिला अतिघोर मूर्ति क्यन । राक्षसया
 विरूप ख्वा जनतापिसं खना भयभित जुया मिखा भ्वे
 भ्वे कं कं चतुर्दिशाय् बिस्युं वन । राक्षस नं जुजुया
 सम्मुखे च्वना ह्लाः बो बो स्याना हे ! दानवीर मणि-

चूड राजा, जि साप तापागु देशं छपिन्थाय् वयागु मेगु कारणं मखु । ताकालं दत जित आहार प्राप्त मजूगु प्यासं अत्यन्त पीडा जुया चवन । प्यास मदेकेया लागी जित लुदंक आहार बिया बिज्याहुँ धका फोन ।

अले जुजुं राक्षसया खँ न्यना कर्मचारीपिन्त सःता आज्ञा जुल । थ्व वया चवंहा राक्षसयात सच्छि व न्येफा (१५०) जाकिया जा थुया सागपात तरकारी दय्का इच्छापूर्ण जुइक नकि धका धयालि राक्षसयात धैर्यता बिया बिज्यात । क्रमशः कर्मचारीपिसं नं जुजुं धाथे तैयार याना राक्षसया सम्मुखे द्वोचिक जा तरकारी तया बिल । राक्षसया चित्त बुळे मजू ।

मजुसैलि मणिचूड राजायात धाल— महाराज, जि ला मांसाहारी अन्न भोजनं सन्तोष मजू । मांस भक्षण व्याघ्रयात नृण न्ह्योने तया बीवं सन्तोष जुइला ? यदि छपिसं धाःधाःपिन्त धाःधाःगु नकेगु प्रतिज्ञा यानागु खःसा ला,हि तया सन्तोष जुइक नकि, मखुसा छंगु प्रतिज्ञा भङ्ग जुई । नके धया ला कि बिदा बी धया ? मफुसा मफु धा ! जि थनंतुं निराश जुया वने धका धाल ।

राक्षसया थथे कटु वचन न्यना जुजुया मने ताप जुल, हाः ! जित गजागु संकष्ट न्ह्योने । बिना मांसं थ्व सन्तोष जुई मखुत, मांस धाःसा प्राणी मस्याकं दैगु

मखु । आ जिं गथे धाःसा हिंसां बचे जुया वयात सन्तोष
याना छ्वे धैगु मती त्वीका च्वन । राक्षसं धाःसा
आपालं बिलम्ब याय्मते, नकेगु जूसा याकनं, नकि धका
तिंति न्ह्या महाशब्द पिकया च्वन । उगु हे समय देव-
दैत्यपिनि महा संग्रामं आपालं प्राणीपि मृत्यु जुया वंगु
जुजुया फसक्क लुमन । अले मृत्युया ला हया राक्षसया
न्होने तया बिल । तया बीवं ऊन तंभोय्का आपा ख्या
याना च्वने मते, सीकया मांस गबलें भक्षण मयाना,
नकेगु जूसा क्वाक्वाः ला क्वाक्वाः हि नकि, मखुसा
जिगु प्राण थनसं त्याग जुई । महान पुण्य कार्य याय्
धका प्रतिज्ञा ला यात, यदि प्रतिज्ञा सफल याय् धैगु
सत्य खःसा न्ह्यागु उपाय याना सां सद्य-मांस नकि ।
बिलम्ब याय् मते, नेपित्यागुलि मृत्यु जुइन मृत्यु जुइ
न्ह्यो मांस-लोहित लुदंक नकि ।

राक्षसया लागी देह त्याग

थनंलि मणिचूड राजां राक्षसया लागी देह त्याग
याय्त चिन्तना यात क्वे नं खः गोया सेंप्वाय्, ला-हि,
चति, ह्ति, खइ नं लेपन याना तःगु अपवित्र देहया छु
माया तया च्वने । छन्हु अवश्य त्वता वने मानि, क्षण-
भरया शरीर खः । 'सम्यक् सम्बोधि ज्ञान' प्राप्त याय्त

विना दुष्करवर्या मयाकं सफल जुइगु अवश्य मखु । उकिं छं प्रतिज्ञा पूर्ण याय्गु ध्येय दुसा मूत्रादि अपवित्रं सम्पादन याना तःगु शरीरया माया कया चवने मते । देह नं सफल जुइगु, प्रतिज्ञा नं पूर्ण जुइगु देव-मनुष्यपिनि बिचे उपहास मजुइगु कथं सो । यदि छ परि-पूरक जुइगु खः सा आः हे खः धका मनयात निश्चिन्त रूपं बोध याना राक्षसयात धाल—

हे सुमित्र राक्षस ! छ निराश जुई मतेनि । छंगु इच्छा पूर्ति याय्त व जिगु प्रतिज्ञा पूर्ण याय्त जिगु थ्व शरीर संकल्प याय् धुन । भतिचा विलम्ब जुल धका तँ चाय् मते, अवश्य भक्षण याकेगु जुल धका भरोसा बिया नाय् सतके छोट । नाय् नं राजाया आज्ञायात शिरोपर याना राजाया न्ह्योने वया बित्ति याना चवन । अले राजां आज्ञा जुल— हे साही, जिगु गपते अधिक हि वइगु हिनू लिकया थ्व चवना चवंगह राक्षसया म्हुतुई तया फुदंक हि त्वंकि धका आज्ञा जुइवं नाय्या हृदय भाराभारा मिका ह्ला-तुति थररर खाका धाल—

भो ! प्रतापि धर्मात्मा राजा, जित थ्व आज्ञा छता बिया बिज्याय् मते । छल्पोल थेंयाह्य राजायात घातक याय्वं जित समस्त लोकं छु धाइगु ? हानं जि नरकं थाहाँ वय् माली मखु, कृपया जित अनुकम्पा तसे

श्व छता ज्या याका बिज्याय् मते, धका क्षमा याचना यात । अले मणिचूड राजा नाय् पाखें निराशा जुया थः थमं तुं तरबार कया प्रहार याय्त तरबार ल्हन । ल्हनेवं पृथ्वी कम्पमान जुल । आकाशे देव-गन्धर्वपि वया स्वया चवन । प्रजागणपि नं दुःख माने यात । पद्मोत्तर राजकुमार व पद्मावती रानीं राजाया तुति ज्वना विलाप यासे निहासिनं शोक प्रकट याना धाल-

पद्मोत्तर व पद्मावतीया शोक

पद्मोत्तरं-“भो बुबा, शरीर घातक याना बिज्याय् मते, आमथे याना बिज्याय्वं जिपिं छु गति जुइगु व थें राज्य सुनां पालन याई । छपिं मदेवं प्रजागणपिनि छु हालत जुइ थें, बुबा प्रजापिनिगु नं खा स्वया बिज्याहुँ” धका निवेदन यात ।

पद्मावतीं-“हे नाथ ! प्रभू स्वामी, जि अबला मिसा जातियात छु याना थके त्यनागु श्व नुगलं सह याय् मफुत । हे नाथ प्रभू ! छपिं मदेका गथे जि श्व राज्ये म्वाना चवनेगु, संसारे मिसा जातिपिन्त स्वामी मदेका म्वाना चवनेगु छुं प्रयोजन मदु । प्रभू स्वामी, श्व राक्षसं फीगु महान कार्य ध्वंस याय्त वोगु खः, प्राण हत्या याना बिज्याय् मते । यदि छपिसं प्राण घातक यात धाःसा

आहुती कव्वाना जि नै प्राण त्याग याय्, प्राणनाथ !
आमथे छता याना बिज्याय् मते ।”

अले थुपि निम्हसियागु शोकयात शान्त याय्या
कारणे मणिबूड राजां उपदेश बिल—

प्रिय ! पद्मावती, छं हथ्या छता याय् मते, संसारे
जन्म जुक्को प्राणी छन्हु मरण जुई मानी, अबले प्रिय
नापं व अप्रिय नाप नं विछोड जुइतिनि । थौं जि अनु-
त्तर सम्यक सम्बोधि ज्ञानया लागी अपित याय् धुन,
छिमिसं जिगु महान दान कार्यस विलाप याना विघ्न
बाधा याय् मत्य धका निहसितं धैर्य बिया थःगु कव्वी
थमं तुं किया राक्षसया म्हुनुई हिया धाः लाका फुदंक
हि त्वंका लिपा ला समेतं नकल । जब राजाया शरीरे
ला, हि मदेवं अति वेदनां मुछित जुल । कवं शरीर
खना प्रजागणपिनि नुगः मछिका मिखां खोबि सोसो
पिकाल । उखुनुया दिने सारा नगरवासीपिनि रुवावास
हे जक जुया च्वन । महारानी नं सँ फँफँ तया छचने व
नुगले दादां कवं शरीरयात घेपुना हाय हाय स्वामी प्रभू,
अबला जि मिसायात अनाथ याना बिज्याइन । भो
प्राण ! जि बुबा भवभूति ऋषीश्वरयाके छु प्रतिज्ञा
याना बिज्याना, थुलि जित जुइगु म्हगसे हे मखं, आः
जि सुया भरे च्वने । दिशा-विदिशा नं मसिल । गन वने

गन चवने वने थास मदु, आः थ्वहे उज्ज्वलगु आहुती
 ववब्बाना वने धका विलाप याना च्वंगु सलं मुछित जूम्ह
 राजाया न्ह्यलं चाम्हथें जुया होशे वेवं बुलुहुँ दना राक्षस
 यात सन्तोष जुल ला मज्जनि ला धका मने तथा 'जिगु
 थ्व अवशेष कवं शरीर नं भक्षण या' धका सम्पूर्ण देह
 त्याग याना राक्षसया न्ह्योने चवना बिल ।

अले राक्षसं राजायात नुना छ्वे थें याना काचाक्क
 घेपुना— महाराज ! जि राक्षस मखु । छंगु दान पारमी
 परीक्षा याय्त भेषधारी जुया वया । जि देवराज इन्द्र
 खः, छंगु दान पारमीया परीक्षा याय् धुन । छ खना
 अति हे सन्तोष जुल आः छं जिके छु फोनेगु इच्छा दु
 पवं धका धाल ।

अले मणिचूड राजां देवेन्द्रया थथे खँ न्यना सम्बो-
 धन याना धाल—

हे कौशिक, जित स्वर्गलोक, ब्रह्मलोकया इच्छा
 मदु, हानं चक्रवर्ति राजा जुया सुख विलासया नं इच्छा
 मदु । केवल जित ला जगत प्राणी उद्धार याना 'सम्यक
 सम्बोधि ज्ञान' प्राप्त याना निर्वाण पद लाय्गु छता
 जक प्रार्थनां दान यानागु खः । थ्व दानया प्रभावं
 अनुत्तर ज्ञान प्राप्त जुइमाल धका फोन ।

अले देवराज इन्द्र' बीफुगु थ्व मखु, आः जि छु बी

धका विचार याना 'सद्योवर' धैगु वासः मणिचूड
 राजाया शरीरे बुला धर्मानुशासन याना थःगु भुवनेसं
 शक्र ल्याहाँ वन । क्रमशः बोधिसत्त्वया दान-पारमीं व
 इन्द्रानुभावं ह्लापा स्वया दुगंछि ला-हि बढे जुया हृष्ट
 पुष्ट जुल । स्वया च्वांपिं परिषद्पिं नं आश्रय चाया
 चवन ।

सल-किसि दान

अनंलि निरंगदशालां प्याहाँ वया असंख्य याचक-
 पिन्त धन-द्रव्य ब्युब्युं परिणामे प्रियपिं सल-किसि नं
 ब्रह्मरथ पुरोहितयात दान बिल । पुरोहितयात ब्यूगु
 दुखेसह राजाया नुगलं सह याय् मफया मणिचूड राजाया
 प्रति द्वेष भाव तया छाय् छःपिसं पुरोहितयात सल-
 किसि दान याना । वयात उकिं छुं प्रयोजन ज्वी मखु ।
 वयात बीगु स्वया जित ब्यूगु जूसा गुलि ज्यूगु खई
 धका धाल ।

अले मणिचूड राजां दुखेसह राजायात नाइक तुं
 सम्बोधन याना धाल- भो ! मित्र राजन, सल-किसि
 ब्राह्मणयात बियागु मेगु छुं मखु, वं आसा याना चवन
 उकिं वयागु आसायात पूर्ण याना बिया, आ जिगु
 मनोरथ नं पूर्ण जुल । बियागु पदार्थ लित नं कायगु

चलन मद्रु, जिं बियागु जिं तुं लिप्याना कायवं जिगु
दानया फल महत्वपूर्ण ज्वीमखु । थुकी शान्त जुया
बिज्याहुँ धका धाल ।

थुलि धया भवभूति ऋषियात आमंत्रित याना जिं
याको दान पुण्यया भाग स्वीकृत याना बिज्याहुँ धका
धया पुण्यानुमोदन याना बिल । अले भवभूति ऋषि
हर्षित जुया राजायात कल्याण ज्वीमा धका आशिर्वाद
बिया थगु आश्रमेसं ल्याहाँ वना मागु भावनादि याना
चवन । जुजुया नं मागु कार्य सीधेका राजदबारे बिज्या-
यत् थिक्क जुल ।

पुत्र व भार्या दान

थुगु हे बखतेसं वाहिक ऋषि छह्य वया मणिबूड
राजायात- भो ! दानवीर छपिनी प्रिय पुत्र प्रिय भार्या
फोनेया लागी वया जिह्य आचार्य्य मारिचि जित चतु-
र्वेद स्यना बिल, आः गुरु दक्षिणाया लागी पद्मावती व
पद्मोत्तर राजकुमार फोना चवन, कृपया सन्तोष पूर्वकं
बिया बिज्याहुँ धका फोन । जब वाहिक ऋषीं थुलि
याचना याय्वं राजाया मने छुयाय् गयाय् जुया घौ
पलख काय् व कलाया खा स्वया विनां जि मदेकं
धुमिगु प्राण रक्षा ज्वी थाकु आ गय् याःसा जी धका

मने त्वीका चवन । अले पद्मावतीं जुजुया मनोभाव
सीका धाल -

भो ! प्रभुस्वामी जिपिं माचाछिया कारणे निश्चिन्त
जुया बिज्याहुँ, छपिनि दान पारमि पुरे याना बिज्याय्गु
जूसा व ज्या थुह्य ब्राह्मणयात लः ल्हाना बिज्याहुँ ।
थुकी जिपिं प्रसन्न जू धका आश्वासन बिल । आश्वासन
बीवं राजाया मने स्वां होय्का, ब्राह्मणयात न्होने तया
जव लहातं सुवर्ण कलस ज्वना खव लहातं पुत्र व भाय्या
ज्वना हामो, कूश, ध्यबा तया स्वस्ति वाक्य ब्वंका
ब्राह्मणयात लः ल्हाना बिल, लः ल्हाय्वं खुता प्रकारं
पृथ्वी कम्प जुल । देव गन्धर्व मनुष्यादिपिनि नं महा
कल्लोल शब्द प्याहाँ वल । अले वाहिक ऋषीं निह्यसितं
का नु आः छिपिं जिह्य दास-दासी जुल जिगु सेवा या
धका लहा ज्वनासाल, सालेवं पद्मावतीया नुग खुलुलुलु
मिना तज्याई थें चवन । हरे, आः जि प्रिय स्वामियात
गथे त्वता वने । धिबकार थ्वः जिगु कर्म स्वामी नाप
विछुद ज्वीका वने माल । आः जि गबले जक खा
खनी थें जित धासा स्वामीया खा स्वयगु मगानि, धा
धाः हिहि ललं विलाप याना ऋषिभरयात थथे धाल-
भो ! ऋषिभर, जि स्वामी महाराजाया खा थौं छन्हु
सिबे खनीगु मखुत, अथेया कारणे थौं छन्हु थनसं चवना

कन्हे जक वने मजीला धका बिस्ति यात । तर वाहिक
ऋषी माने मजू, मजुसेलिं राजायाके बिदा कया खख्वँ
ऋषी नापं मारिची ऋषीश्वरयाथाय् वन । वना उह्म
ऋषीश्वरया खँयात शिरोपर याना दास-दासी थें ज्या
याना चवन ।

मणिचूड राजाया नं थमं निमन्त्रण याना तयापिं
राज अमात्यपिन्त हिरण्य आदि बिया मर्यादा तया
सकलयात बिदाबादि बिया थगु राज दबरे ल्याहाँ
बिज्यात ।

सल-किसि दानया युद्ध

दुर्खेसह राजा नं थगु देशे वना थह्म मन्त्री नापं
सल्ला याना सल-किसिया विषये युद्ध याय्त साकेत
नगरया राजा मणिचूडयाथाय् दूत छोट । दूत वनालि
राजा सहित मन्त्री मण्डले थथे धाल ।

भो ! दानपति महाराज, दुर्खेसह राजां आज्ञा
बिया हल कि, वस्पोल नापं मित्रता दुसा सल-किसि
ब्राह्मणयाके कया दुर्खेसह राजायात बिया बिज्याहुँ,
मखुसा युद्ध याना किसि सहित देश कब्जा याना काइगु
जुल । का महाराज थुकी छु लिसः बीगु खः, बिया
बिज्याहुँ, सल-किसि बीगु ला युद्ध याना बिज्यायगु

याकनं प्रत्युत्तर व्यु जि वना वहे मुताबिकं धाय् धका
 धाल । अले सुबाहू मन्त्रीया क्रोध प्याहाँ वल, अरे दूत
 छिमि जुजुया ल्वाय्गु गुलि शक्ति दु । उलि शक्ति
 बल्लाका वा धा, मखुसा दूर देशे बिस्सुं वना चवने
 माली धका धया व्यु हुँ धका छोट । अले दूत वना
 जूगु खँ वृत्तान्त दुखेसह राजायात कन । थुखे सुबाहू
 मन्त्रीं दूतयात धया छ्वेवं मणिचूड राजां आज्ञा जुज -
 हे मन्त्री, दुखेसह राजाया उपरे क्रोध पिकया ल्वाय्गु
 खँ ल्हाय मते । ल्वात धायवं धुँ नं फू, गुं नं फू धैथे
 निखे ध्वंस जुई, आपा चवने दुगु थ्व संसार मखु । छाय्
 म्वासां म्वासां संग्राम याना चवनेगु, बरू छं धाय् धासां
 दान बीधुंहा सल-किसि लितकाय् मखु धाःसा गुलिज्जु
 धका उपदेश बिल ।

उखे अयोध्या नगरे नं दुखेसह राजा तँमोयका
 लडाई याहे याय् धका मागु युद्ध सामान तैयार याना
 युद्धसेनापिं मुंका साकेत नगरया पिने छचाखेरं घेरा
 बिया चवन । राजा मणिचूड जं प्रासादया बुर्जा कोस्व-
 बले नगरया पिने छचाखेरं सेनापिं खन । अले सुबाहू
 मन्त्री याके हूँ देशया पिने सेनात छाय् चवना चवंगु
 धका न्यन । न्यनेवं मन्त्रीं धाल । महाराज कीपि नापं
 ल्वाय्या लागी वया चवंगु, आः जित अमुबस बिया

बिज्याहुँ, अपि नापं त्वायत जि वनालि अमि दक्को
योधा तयत् खड्गं चकनाचूर ज्वीक मोचन याना दुखे-
सह राजायात पाता कसे याना ह्य् धका धाय्वं
मणिचूड राजां आज्ञा जुया बिज्यात ।

हे ! मन्त्री परया निम्ति रक्त-मांस समेतं जि त्याग
याना बिया आः व किसि छह्याया कारणे उलिमछि
मनुष्यपिनि हि बा न्ह्याइगु ज्याय् गथे जि छन्त अनुमति
ही, बरू की ब्राह्मण्यात चित्त बुक्रे ज्वीकथं हिरा, मोती
आदि बिया किसि लितकया दुखेसहयात तुं बिया छ्वेगु
जूसा जिगु अनुमति दु अहंकार अभिमानी जुया त्वाय्गु
खँ त्हाय मते, शान्त जु, क्रोधयात अक्रोधं त्याकि,
अशान्ति यात शान्ति त्याकि, धका उपदेश ब्युगुलि
मन्त्रीयात छु याय् गथे याय् धैथें जुल । तर राजाया
उपदेशयात ग्रहण याना परिणामे थगु तंयात थमं तुं
स्याना च्वन ।

थनंलि राजाया संसार विषये वैराज्ञ उत्पन्न जुल,
ताकाल म्वाना च्वने दुगु थ्व संसार मखु लःया । बुलबुल
थें छन्हु मर्णन्ति जुया वने मानी । थ्व अनित्य संसारया
छु माया काय्गु । राज्य भोगया विलाश नं मयल । आः
जि वन बास बना योग ध्यान याना च्वने माल धका
विचार याना कसुका तया आकासे थस्वत । आकासे नं

ण्यहा प्रत्येक बुद्ध' राजाया चित्त सीका वया च्वंगु खन,
 खनेवं बिनित्त याना भो महाऋषी मुनिपि ! जिगु उपरे
 अनुकम्पा तथा बिज्याहुँ धका आराधना याना मागु
 संग्रह याना बिज्यात । अनंलि थःगु दुःखया खँ प्वंका
 प्रपंचं छुते ज्वीमाल धका पार्थना यात । प्रार्थना यायवं
 प्रत्येक बुद्धपिसं महाराज छं छुं धन्दा काय मते, छंगु हे
 उपरे दया तथा वयागु खः, आः छं जिमिगु चीवर च्वः
 ज्वं छन्त आकास मार्ग यंका एकान्त थाय् तथा बी,
 धका आश्वासन याना आकास मार्ग ब्वय्का रमणीय
 वन भूमी यंका योगध्यानादि याना सुख पूर्वकं च्वना
 च्वं छुं, गथे जुया आपत्-विपत् वल धाःसा जिमिगु नां
 लुमंकि, छन्त जिपि वया उद्धार याःवय् धका मनयात
 धैर्यता बिया प्रत्येक बुद्धपि थःगु थासेसं ल्याहाँ
 बिज्यात ।

राजा मणिचूडया नं ध्यान भावना याना जंगलया
 सुख अनुभव याना च्वन । वस्पोलया मैत्रीं जंगलवासी
 धुं, भालु, सिंह आदि अनेक जन्तुपिनि नं थवं थः प्रेम
 बढे जुल, सुनानं स्वीगुं उपरे हिंसा यायगु मन मन्त ।

राजर्षि मणिचूडयात परीक्षा

अनंलि छन्हु राजर्षि मणिचूडयात परीक्षा याना स्वे

धका गौतम ऋषी हिमालयया आसपासे च्वना चवंम्हे-
सिथाय् वना थथे धाल-

महाराज ! छाया थपाय्चवो अगम्यगु वने च्वना
बिज्यानागु, थन भयानकपि जन्तुत दु, थजागु ग्यानापुगु
निरंजन वन मध्ये च्वना छाया दुःख सिया बिज्यानागु?
विशाल राज्यैश्वर्य त्याग याय् मते । प्रजापिन्त प्रति-
पालन याना साकेत नगरया वैभव भोग याना च्वं ।
यौवनया अवस्थाय् राजपात त्वःता दुःखसिया च्वनेमते
धका धाल ।

अले राजा मणिचूडं प्रत्युत्तर बिल- भो ! ऋषीजु,
छपिके उलि हे ज्ञान मदुला ? छु खँ धया बिज्यानागु,
'संसारे जरा दुःख, व्याधि दुःख, मरण दुःख धयागु दु ।
जिला थ्वहे कल्पना याना कि भव दुःखं मुक्त ज्वीगु व
दुःख समुह जुया च्वंगु राज्यैश्वर्य आः जित मागु मदु ।
जित ला थन हे सुख शान्ति दु धका लिसः बिल । थथे
खँन्यना गौतम ऋषी सन्तोष जुया थःगु आश्रमेसं वन ।

थनंलि साकेत नगरे मडिचूड राजा वियोग जूगुलि
सकल प्रजापिनि अपशोच जुल । जुजु मदुगु देश छुं
शोभा मदु । आः सुयात जुजु याय् धका विचार यात,
लिपा सकलया सम्मति पद्मोत्तर राजकुमारयात तुं राज्य
बिइमा धका सल्लाह याना असंख्य धन बिया मारिची

ऋषीयाथाय् छोट । मारिची ऋषीयात माक्को धन
बिया पद्मोत्तर राजकुमारयात लित ब्वना ह्या राज्या-
भिषेक बिल ।

साकेत नगरे संग्राम

अले राज्याभिषेक बिया गुलिचां मदुवं युद्ध याय्गु
आरम्भ जुल । सुबाहू मन्त्रीं शत्रु-दुष्ट राजायात संहार
याय्या लागी युद्ध सामग्री तैयार याना सकल सैन्यपिन्त
शस्त्र-अस्त्र बिया अनेक प्रकारया व्यन-बाजा थाका
पद्मोत्तर राजा न्ह्यो न्ह्यो तया दुष्मन राजा नापं
युद्ध यात । युद्ध यायां लिपा दुर्खेसह राजा पाखे आपालं
सैन्यापि मृत्यु जुल । युद्ध भूमिइ खुसि न्ह्याथे हि बाः
न्ह्यात । दुर्खेसह राजाया क्ळन क्रोध प्याहां वल ।
क्रोधं पद्मोत्तर राजायात राक्षसं मिखा कंथे कना व्याघ्रं
ल्यूथें लित । परिणामे थहे असमर्थ जुया निराशां बिस्पूं
वन । अले अबशेष जुया च्वांपिं दुष्मन सैन्यतेत कक्कु
ज्वंज्वं म्वे थ्याथ्यां, ह्ला-तुति त्वथुथुं सम्पूर्ण दुष्मनत
हटे याना थःगु देशयात कब्जा याना कया 'जय गान'
याना प्रजापिन्त सुखानन्द बिया बांलाक राज्य चले
यानाचवन ।

राजर्षि मणिचूडयात दुतिय परीक्षा

अनंलि इन्द्रं मणिचूडया चित्त परीक्षा याय्त देव
 पुत्र छह्यसित सःता खँ स्यन, हे पुत्र ! छ मारिची
 ऋषीयाथाय् वना पुष्प वने स्वाँ श्वः वइह्य पद्मावती
 रानीयात बलात्कारं ज्वना राजर्षि मणिचूड चवना चवंगु
 हिमाल वने यंका सास्ती या धका छोट । अले व देव
 पुत्र व्याधाया भेष कया मारिची ऋषीया पुष्प वने
 चवंचव वल । तदन्तर पद्मावती नित्य पूजाया लागी स्वाँ
 श्वः वल । वेवं सँ प्वाँय् ज्वना रानीयात लुत्तु लुया
 यंकल । रानी भयभित जुल, ह्य थररर खाका कल्लोल
 शब्द पिकया, जित सुनां रक्षा याः वइ, हा देव ! जि
 अभागिनी मिसायात व्याघ्रं ज्वंथे ज्वंका दुःख कष्ट
 नया चवने माल । हाय हाय ! जिह्य दयासागर स्वामी
 थौं गन चवना बिज्यात जुइ, अजाह्य दयानिधि महा-
 राजया पत्नीयात थौं चण्डाल व्याधां सास्ती याका चवने
 माल । भो प्रभू स्वामी ! छपि गन दु, जि अनाथ
 मिसायात रक्षा याः बिज्याहुँ धका गुँ (वन) छगुलिं
 श्वेक खया चवन । वन श्वःगुलिं छु शब्द वोगु थें धका
 राजा आश्रमं दना प्याहाँ वया ध्यान तया न्यना चवन ।
 विरहनं राजाया गुण स्मरण याना ग्वाहाली पवना

चवंगु ताल । ताय्वं थ्व सु जुइ, थपाय्चवो अगम्य जंगले
 विलाप याना जित स्मरण याना चवंह । छुं दुःख जुया
 चवंगुलि हे मखा जुइ जित लुमंका चवंगु जुइ धका
 मती ल्वीका वयात धैर्यता बिया छोट । छ सु खः, गुह्य
 खः, छन्त रक्षा याय्त जि बया चवना ग्याय्मते धाधां
 शब्दया शूरे पद्मावतीयाथाय् थ्यंक वन । अले पद्मावतीं
 थः स्वामीया पाली भोपुया नाना प्रकारं विलाप याना
 धाल- स्वामी ! जित लुमंनि ला ! जि व पुत्रयात दान
 बिया बिज्यागु बखते जि मदेक स्वामी नाथया प्राण
 स्थिर जुइ मखु धका आज्ञा जुया बिज्यात, आः व खँ
 छु जुल । स्वामी, म्वाल आः व वने धुंकुगु खँ । आवंलि
 राज्यसं चवंवने नु । क्षत्रिय वंश जुया चवनाह्य छल्पो-
 लया भार्यायात थयिनह्य चण्डाल व्याधां सास्ती याका
 चवने माल । भो प्रभू स्वामी ! जित थ्व दुःखं मुक्त
 याना बिज्याहुँ धका निवेदन यात । अले राजर्षि
 मणित्रूडं व्याधयात थथे धाल-

हे भद्र मुख व्याधा ! छं थ्व मिसायात हरण
 याय्गु अयोग्य, थ्व मिसा काश्यप गोत्र मारिची ऋषीया
 दासी खः । उम्ह ऋषीं सिल धाय्वं छन्त भष्म याइ
 धका ख्याचवो बिया बित्तिके छोट ।

अमंलि पद्मावतीयात धीरज बिल, पद्मावती विलाप

याय्मते । सकल प्राणीया हालत थथे हे खः, ह्लापा व
 लिपा दुःख-सुख जुइगु सांसारिकया स्वाभाविक खः ।
 हाला-खवयां दुःखं मुक्त जुइगु मखु । थथे शोक सन्ताप
 जुइ धका हे सुखाभिलाषा त्याग याना तपोवन वया,
 पद्मावती, छ व जि बाय् माल धका मने दुःख ताय्मते ।
 ताकाल तक ह्वना चवने दुगु जीवन थ्व मखु । थौं ला
 कन्हे ला थथे अथे धाय्फुगु थ्व देह मखु । अथेया कारणे
 मारिची ऋषीयाथाय् ल्याहाँ हुँ, धका बिदा बिल । बीवं
 छह्य देवतां मनुष्य रूप कया मणिचूडयात काःमे भुले
 याय्त थथे धाल-

हे मणिचूड ! छन्त धात्थें नं सुखावती वास लाइ,
 विस्मात् याय् मते । अनाथ अवला मिसायात दुःख-कष्ट
 सिके मते । वयागु उपरे स्नेह ति, अगम्य जंगले चवना
 छाय् दुःख भीग याना चवनेगु, बिज्याहुँ थःगु राज्य
 ऐश्वर्य सुख विलाश याय्त धका धया हय्वं मणिचूडं-
 हे पापी मार ! छ सु खः जित कामे दुपवाय्त सना
 हाला चवंह्य । छ जित कामे दुफिनां फी फैमखु, हुँ छ
 मागु थासे धका धया छोट । अले उह्य मार असमर्थ
 जुया ल्याहाँ वन । पद्मावती नं मिखाय् खबि जाय्क
 तया नुगः मछिका मारिची ऋषीयाथाय्तुं ल्याहाँ वन ।
 अले मारिची ऋषीं पद्मावतीया नुगः मछिगु सीका

वयात बिदा बिया साकेत नगरेसं छोया बिल । पद्मावती
थःगु राज्येतुं वना सुखपूर्वकं आनन्द कया चवन ।

अयोध्यानगरे दुर्भिक्ष

अनंलि अयोध्यानगरे दुर्भिक्ष जुया असंख्य जनतापि
मृत्यु जुल । जनसंख्या ह्लियाह्लिथं पाः जुया वंगुलि
दुखेसह राजां छु उपाय याःसा सुभिक्ष ज्वी धैगु विचार
यात । परिणामे मणिचूडया शिरोमणि ह्या मणि लखं
हाःहाः यात धाःसा अवश्य देशे सुभिक्ष जुया वइगु
सम्भव दु, धका विचार ल्वीका न्याह्य ब्राह्मणपिन्त
सःता धाल- पुरोहितपि, छल्पोलपि हिमालय बिज्याना
मडिचूडया शिरोमणि पवना हति धका नियोजित याना
छोत ।

थुगु हे समये मणिचूडं हिमालय आश्रम त्वता
वर्तमाने नां जुया चवंगु मणिचूडे वया चवन । थन वसां
निसें वसपोलया दान बीगु इच्छा नं दया वल । छन्हु
वसपोलया मने थथे लुल सुं वया जिगु शरीरे चवंगु छुं
पवन धाःसा सर्वाङ्ग दान बिया छ्वे, धका मने तया
आसनं दना उखें-थुखें स्वया चवन । थबलेलाक्क न्याह्य
ब्रह्म अन थ्यंक वन । उपि न्याह्य ब्राह्मणपि वोगु खना
मणिचूड राजां आश्रमे यंका मर्यादा तया फलमूलादि

यक्को हि बा न्ह्याकल, हिया बा न्ह्याना वंवं रोहिणी नदी मिले जुल । स्वया चवंह्य वन देवीं हिबा न्ह्यागु स्वया चवने मफया वन छगुलिं थ्वेक लाय् लाय् बुबुं हाला खवया हल ।

ब्राह्मणपिसं नं अति कष्ट याना मणि लिकया राजाया ल्हाती तया बिल । राजां व मणिरत्न स्वया अत्यन्त हर्ष जुयालि उपिं ब्राह्मणपिन्त दान बिल । अले दानया प्रभावं सारा पृथ्वी कम्प जुल । देवगणपिनि नं आश्चर्य अद्भूत जुल । थ्व छु हेतुं भूकम्प जूगु ज्वी धका विचार यात । लिपा थुल कि मणिचूडे मणिचूड राजां शिर फाय्का मणि दान ब्यूगु अले सारा भूवनया देवतापिं जम्मा जुया मडिचूड राजायात चवस्वाँ, पलेस्वाँ, पालजास्वाँ आदि अनेक प्रकारया स्वाँनं पूजा याना हल ।

ब्राह्मणपिं नं मणि दान कया सन्तोषं अयोध्या देशे वना उगु मणिरत्नया पाखें ज्या काल । मणिचूडं मणि लिकाय्का बिया छ्वेवं असह्य दुःख वेदना जुया मुक्षित जुल, अले शक्रदेवं संजीवनी वास' शिरे लेपन याना दुःख वेदना शान्त याना बिल ।

अनंलि मारिची ऋषीया नं सन्देह जुल, विनां छ्हा हेतु मदेकं अर्थे हे पृथ्वी कम्पमान ज्वीमागु मदु धका

चिन्तना याता निसः (२००) शिष्यापि ब्वना मणिचूडे
 ब्वल । वेवं राजाया दुर्दशा खन, नुगःपा भाराभारा भिका
 हथा हथासनं वनदेवीयाके न्यन । तदनन्तर भवभूति
 ऋषीं नं सीका आकाश मार्गं साकेत नगरे वना मडिचूडे
 जूगु वृतान्त समाचार पद्मोत्तरयात व पद्मावतीयात
 कना निहसितं आकाश मार्गं हया उगु गति जुयाचवंगु
 वयन । अले उरिपि निम्हं छयंने दादां तसकं विलाप यात ।
 विलापया सलं राजायात होश दत । होश देवं छचाखेरं
 स्वत । देवगर्णपि व ऋषीमुनि खन । खनेवं जुरूक्क दना
 फेतुत । फेत्वीवं ऋषी मुनिपिसं न्यन— महाराज, छाय्
 थपाय्चवो वेदना ज्वीक मणि दान बियागु ? अले राजां
 ऋषी मुनिपिन्त थथे आज्ञा जुया बिज्यात—

भो ऋषी मुनिपि ! जिं थ्व दान बियागु मेगु कारणं
 मखु । सम्यक सम्बोधिज्ञान, प्राप्त याय्त व लोकवासी
 पिन्त हित-सुख याय्त दान बियागु जुल धका आज्ञा
 जुन्या बिज्यात । थुलि खँ न्यने मात्रं सकल देव-गन्धर्व
 मनुष्य आदिपि सन्तोष जुया दुतिय बार नं स्वाँ वा
 गाय्का विदा जुया वन । लिपा पद्मोत्तर राजा व महा-
 रानी मणिचूड राजाया चरण कमले भोपुया विलाप यासे
 प्रार्थना यात । बुबा ! बिज्याहुँ नु कीगु देशे, बुबा मद्दु-
 गुलिं प्रजापिसं दुःखसिया चवन । ह्वापा थें प्रजापिन्त

महान करुणा तसे राज्य चलेयाना बिज्याहूँ धका आग्रह यानावं चवन । वास्तवे उगु हे बखते प्रत्येक बुद्धपि थ्यंक बिज्यात । मणिचूडया सुचरित्र खना आश्चर्य अद्भूत चाया थथे आज्ञा याना बिज्यात—

हे मणिचूड राजा ! छ खना अति हर्ष जुल । आः थःगु देशे तुं वना राज्य याना चवं । छं पुत्र व भार्या-पिसं अति शोक सन्ताप काल, यदि छ आः मवन धाय्वं थुपिं निहसियां छाती गना हि ल्ह्वया मरणान्त जुइ धका धयालि स्वह्य माचाछियात नं प्रत्येक बुद्धपिसं साकेत नगरे यंका धर्मानुकूलं राज्य पालन याना सुख विलास याना चवं धका उपदेश बिया हिमालयसं ल्याहाँ बिज्यात ।

अनंलि दुखेंसह राजायात ज्ञात जुल कि मणिचूड राजा हानं वया राज्य भोग याना चवन धैगु सीका क्षमा पवंवल । राजा मणिचूडं नं क्षमा व धन हानं बिया छोट ।

निगमन

शास्ताँ सहस्र उपयुक्तगु 'मणिचूड' राजा' या खँ कने सिधेका पुनः थथे आज्ञा जुया बिज्यात—

‘हे भिक्षुपि ! उगु बखते दुखेंसह राजा आःया

देवदत्त खः । उगु बखते ब्रह्मदत्त, शुद्धोदन महाराजा
 तथा महारानी कान्तीमती महामाया देवी खः । पद्मा-
 वती रानी व पद्मोत्तर राजकुमार आःया यशोधरा व
 राहुल कुमार खः । उगु बखते ब्रह्मरथ पुरोहित आः
 सारिपुत्र खः । भवभूति ऋषी आः आनन्द भिक्षु खः ।
 मारिची ऋषी, आः काश्यप भिक्षु खः । बाकि दुपिं सकल
 परिषद् आः दुपिं बुद्ध परिषद् खः । राज । मणिचूड
 स्वयं जि हे खः धका आज्ञा जुया बिज्यात ।

॥ ववचाल ॥

धर्मकीर्ति प्रकाशन :-

नेपाल भाषा :-

- १) बुद्धया किनिगू विपाक
- २) अभिधर्म भाग-१
- ३) मैत्री भावना
- ४) ऋद्धि प्रातिहार्य
- ५) योह्य म्हाय्
- ६) पञ्चनीवरण
- ७) बुद्ध धर्म
- ८) भावना
- ९) एकताया ताःचा
- १०) प्रेम छु ज्वी ?
- ११) कर्तव्य
- १२) मिखा
- १३) बुद्धया अन्तिम यात्रा-१
- १४) " " " -२
- १५) त्रिरत्न गुण स्मरण
- १६) परित्राण
- १७) कर्म
- १८) प्रार्थना संग्रह
- १९) बाखँ भाग-१
- २०) " " -२
- २१) " " -३
- २२) मर्ति भिसा गति भिनी
- २३) बौद्ध ध्यान
- २४) पञ्चशील
- २५) हृदय परिवर्तन
- २६) ह्यापांयाह्य गुरु सु ?
- २७) बोधिसत्त्व
- २८) शाक्यमुनि बुद्ध
- २९) अनत्त लक्षण सुत्त

- ३०) वासेट्टी थेरी
- ६१) धम्मचक्रपुवत्तन सुत्त
- ३२) लक्ष्मी द्यो
- ३३) महास्वप्न जातक
- ३४) अभिधर्म भाग-२
- ३५) बाखँया फल भाग-१
- ३६) " " " २
- ३७) ज्ञातक बाखँ
- ३८) राहुलयात उपदेश
- ३९) अहिंसाया विजय
- ४०) प्रौढ बौद्ध कक्षा
- ४१) मूर्खता पासा मज्जू
- ४२) बुद्धया अर्थनीति
- ४३) श्रमण नारद
- ४४) क्षान्ति व मैत्री
- ४५) उखानया बाखँ पुचः
- ४६) पालि भाषा अवतरण
- ४७) पालि प्रवेश
- ४८) चमत्कार
- ४९) मणिचूड जातक

नेपाली भाषा :

- १) बौद्ध प्रश्नोत्तर
- २) बौद्ध दर्शन
- ३) नारी हृदय
- ४) बुद्ध शासनको इतिहास
- ५) पटाचारा
- ६) ज्ञानमाला
- ७) बुद्ध र उहाँको विचार
- ८) शान्ति
- ९) बौद्ध ध्यान